

seynd/ flache Schalen von Englischem Zinn/  
wol vnd sicher gebrauchen.

## CAP. XV.

De Elæofaccharis, oder von der  
Zubereitung vnd utiliteten der mit  
Zucker vermischten gedistil-  
lirten Olieten.

Nach dem die Olieten der Aromatum vnd  
allerley Art wolriechender hitziger simpli-  
cien was sie für einen Nahmen haben sehr köst-  
liche vnd nützliche medicamenten seynd/ vnd a-  
ber dieselbige also in formâ liquidâ bey ihren  
Kräften zu bemahren/ ziemlich beschwerlich ist/  
Sintemahl dieselbigen wegen ihrer luffrigen/  
vnd vberaus durchdringenden feurigen pene-  
trantz (wann sie durch einige wärme der Luft/  
od sonsten agitirt, ob sie schon in Gläsern/ durch  
die ordinari Mittel wol vermacht gehalten wer-  
den) ihre subtilste vnd spirituosische theil leicht-  
lich verlieren/ vnd nur einen zähen Terniß / als  
auch bey etlichen einen galstrigen liquorem hin-  
terlassen; Wie es auch/ wenn man dieselbigen  
offte gebrauchen will/ nebenst andern Unbeque-  
migkeiten/ durch das offtere auff vnd zu machen  
der Gläser/ einen grossen anlaß zur ausdämpf-  
fung.